



REPUBLIKA E SHQIPËRISË
Kuvendi

PROJEKT LIGJ

NR._____/2018

PËR

NJË SHITESË NË LIGJIN NR.8328, DATË 16.4.1998,
“PËR TË DREJTAT DHE TRAJTIMIN E TË DËNUARVE ME BURGIM
DHE TË TË PARABURGOSURVE”, TË NDRYSHUAR

Në mbështetje të neneve 78 dhe 83, pikat 1, të Kushtetutës, me propozimin e Këshillit të Ministrave, Kuvendi i Republikës së Shqipërisë

V E N D O S I:

Neni 1

Pas nenit 13, të ligjin nr.8328, datë 16.4.1998, të ndryshuar, shtohet neni 13/1, si më poshtë vijon:

“Neni 13/1

Regjimi i posaçëm i ushtrimit të të drejtave në burgun e sigurisë së lartë

Të dënuarit në burgun e sigurisë së lartë për një vepër penale, të kryer në kuadër të pjesëmarrjes në grup të strukturuar kriminal, organizatë kriminale, bandë të armatosur, organizatë terroriste apo për vepra me qëllime terroriste, dhe të paraburgosurit që hetohen apo gjykohen për këto vepra penale, të parashikuara në nenet 230, 230/a, 230/b, 230/c, 230/ç, 231, 232, 232/a, 234, 234/a, 234/b, 283, paragrafi 3, 283/a, paragrafi 3, 284/a, 284/c, paragrafi 3, 284/ç, paragrafi 3, 333, 333/a dhe 334, të Kodit Penal, për shkak të rrezikshmërisë së lartë shoqërore, i nënshtrohen një regjimi të posaçëm të ushtrimit të të drejtave.

Regjimi i posaçëm i ushtrimit të të drejtave konsiston në:

- a) masa të brendshme dhe të jashtme të sigurisë së lartë, që lidhen, kryesisht, me nevojën për të parandaluar:
- i. kontaktet me organizatën kriminale ku bëjnë pjesë apo me organizata të tjera, me të cilat ata bashkëpunojnë;
 - ii. konfliktet e mundshme me elementë të organizatave kundërshtarë;
 - iii. ndërveprimin me të burgosurit apo të paraburgosurit e tjerë, të cilët i përkasin së njëjtës organizatë ose të organizatave të tjera, me të cilat ata bashkëpunojnë;
 - iv. komunikimin apo shkëmbimin e sendeve ndërmjet të dënuarve apo të paraburgosurve që i përkasin grupeve të ndryshme.
- b) lejimin e një takimi familjar në muaj, i cili kryhet në intervale të rregullta kohore dhe në mjedise të caktuara, ku ndalohej hyrja e personave apo sendeve të tjera dhe që i nënshtrohen regjistrimit audio dhe video. Me termin “familjarë” nënkuptohen të paralindurit, të paslindurit, bashkëshortët dhe bashkëjetuesit. Në raste të jashtëzakonshme, takimi me persona të ndryshëm nga familjarët, për personat e dënuar, kryhet me propozimin e drejtorit të institucionit dhe me miratimin e ministrit të Drejtësisë. Për personat e paraburgosur, takimi me persona të ndryshëm nga familjarët kryhet vetëm me miratimin e prokurorit. Parashikimet e këtij paragrafi nuk zbatohen për takimet me avokatët mbrojtës;
- c) lejimin e të dënuarit ose të paraburgosurit, i cili nuk kryen takime familjare, për kryerjen një bisede telefonike në muaj, me kohëzgjatje maksimale dhjetë minuta, e cila regjistrohet. Kryerja e bisedave telefonike për personat e dënuar autorizohet me vendim të arsyetuar të drejtorit të Përgjithshëm të Burgjeve, kurse, për personat e paraburgosur, ajo autorizohet me vendim të arsyetuar të prokurorit;
- ç) ndalimin e përdorimit të vlerave monetare, sendeve dhe objekteve që mund të marrë i dënuari ose i paraburgosuri nga jashtë, sipas parashikimeve në rregulloren e brendshme të institucionit;
- d) kontrollin e korrespondencës, përveç asaj me subjektet e përcaktuara në nenin 43, të këtij ligji, ose me organizata ndërkombëtare, që ushtrojnë aktivitetin e tyre në fushën e mbrojtjes së të drejtave të njeriut;
- dh) reduktimin e qëndrimit në ajrim në mjedise të hapura, por jo më pak se 1 orë në ditë;
- e) përjashtimin nga organet përfaqësuese të të dënuarve apo të paraburgosurve.

Me kërkesë të të dënuarit ose të paraburgosurit, pas një periudhe njëvjeçare, ministri i Drejtësisë mund të rivlerësojë nëse janë kushtet për vazhdimin e regjimit të posaçëm të ushtrimit të të drejtave ndaj të dënuarit ose të paraburgosurit. Për marrjen e vendimit, ministri i Drejtësisë merr, paraprakisht, mendimin e prokurorit, të ministrit të Brendshëm si dhe të gjitha të dhënat e

tjera të nevojshme nga Drejtoria e Përgjithshme e Burgjeve, organet e Policisë së Shtetit dhe atyre të specializuara në luftën kundër krimit të organizuar e terrorizmit, sipas fushave të përgjegjësisë.

Ministri i Drejtësisë vendos zgjatjen e afatit për periudha të tjera njëvjeçare të ushtrimit të Regjimit të Posaçëm ndaj të dënuarit ose të paraburgosurit kur ekzistojnë ende rrethana lidhur me:

- a) aftësinë e të dënuarit për të mbajtur lidhje me organizatën kriminale apo terroriste, duke marrë në konsideratë edhe profilin kriminal dhe rolin e subjektit brenda organizatës, si dhe vazhdimin e veprimtarisë së bashkëpunimit kriminal;
- b) ekzistencën e akuzave të reja, të pa vlerësuara më parë;
- c) rezultatin e trajtimit penitenciar si dhe të standardit të jetesës së anëtarëve të familjes së subjektit.

Kalimi i kohës nuk përbën, në vetvete, një element të mjaftueshëm për të përjashtuar aftësinë e të dënuarit në regjim të posaçëm për të mbajtur lidhjet me organizatën apo për të provuar mungesën e operativitetit të saj.

Kundër vendimit të ministrit të Drejtësisë, i cili ka vendosur zgjatjen e regjimit të posaçëm, i dënuari, i paraburgosuri apo avokati mbrojtës mund të paraqesin kërkesë ankimore brenda 20 ditëve, nga momenti i njoftimit të vendimit.

Kërkesa ankimore depozitohet në gjykatën e rrethit gjyqësor, e cila është kompetente për gjykimin e çështjes sipas parashikimit të nenit 470, të Kodit të Procedurës Penale. Gjykata procedon sipas mënyrës së parashikuar në nenin 471, të Kodit të Procedurës Penale. Gjykimi i çështjes nuk pezullon vendimin e ministrit të Drejtësisë.

Në qoftë se kërkesa kundër vendimit të ministrit të Drejtësisë pranohet nga ana e gjykatës, ministri i Drejtësisë, në rast se do të urdhërojë një vendim të ri, duhet të mbajë parasysh përcaktimet e bëra në vendimin e gjykatës, duke shtuar elemente të rinj ose që nuk janë vlerësuar nga ana e saj.”.

Neni 2 **Hyrja në fuqi**

Ky ligj hyn në fuqi 15 ditë pas botimit në “Fletoren zyrtare”.

K R Y E T A R I

GRAMOZ RUÇI